

**ROGHNÚ BAILL FOIRNE SHEALADAIGH LE HAGHAIDH ARD-STIÚRTHÓIREACHT  
NA CUMARSÁIDE (DG COMM)**

Tá próiseas roghnúcháin seachtrach á eagrú ag an gCoimisiún Eorpach chun post an Chomhairleora maidir le Feachtais Cumarsáide Corparáidí a líonadh in Ard-Stiúrthóireacht na Cumarsáide (DG COMM), post a bhaineann le Stiúrthóireacht B Straitéis agus Cumarsáid Chorporáideach. Is sa Bhruiséil, an Bheilg, atá an post seo.

**1. DUALGAIS AN PHOIST**

Áirítear ar fhreagrachtaí an Chomhairleora maidir le feachtais cumarsáide corparáidí:

- Comhairle a chur ar an Stiúrthóir atá i gceannas ar an gcumarsáid chorporáideach agus ar chúrsaí straitéise maidir leis an straitéis le haghaidh feachtais chorporáideacha, lena n-áirítear ceapadh, dearadh agus cur i bhfeidhm na bhfeachtas chorporáideach, pleanáil agus ceannach meán cumarsáide, agus faireachán agus meastóireacht ar na feachtais.
- Comhairle a chur ar an Stiúrthóir maidir le cur chuige comhleanúnach idir feachtais cumarsáide polaitiúla agus feachtais cumarsáide corparáidí.
- Comhairle a chur ar an Stiúrthóir agus ar bhaill foirne sa Stiúrthóireacht maidir le ceisteanna airgeadais agus conarthacha agus maidir leis an gcomhar le conraitheoirí.
- Comhairle a chur ar an Stiúrthóir maidir le gníomhaíochtaí cumarsáide corparáidí a chur chun feidhme agus faisnéis a thabhairt do shaoránaigh.
- Ionadaíocht a dhéanamh don Stiúrthóireacht i gcruinnithe inmheánacha agus i gcruinnithe seachtracha.

**2. CINEÁL AGUS FAD AN CHONARTHA**

An t-iarrthóir a n-éireoidh leis, d'fhéadfadh sé go dtairgfí conradh sealadach dó faoi phointe (a) d'Airteagal 2 de Choinníollacha Fostaíochta Sheirbhísigh Eile an Aontais Eorpaigh<sup>1</sup> i gcomhréir leis an gCinneadh ón gCoimisiún an 16 Nollaig 2013 maidir le beartais i leith gníomhairí sealadacha a fhóstu agus a úsáid<sup>2</sup>. Ceithre bliana ar a mhéad a mhairfidh an chéad chonradh, agus féadfar dhá bhliain ar a mhéad a chur leis sin.

Agus uasfhad an chonartha á shocrú, cuirfear san áireamh forálacha ábhartha an Chinnidh ón gCoimisiún an 16 Nollaig 2013 lena leasaítear an Cinneadh ón gCoimisiún an 28 Aibreán 2004 maidir leis an uasfhad is féidir foireann neamhbhuan a úsáid (7 mbliana in achar 12 bhliain)<sup>3</sup>.

**AN ÁIT FOSTAÍOCHTA**      An Bhruiséil, AN BHEILG

**LEIBHÉAL**

AD13

<sup>1</sup> <https://eur-lex.europa.eu/legal-content/EN/TXT/?uri=CELEX%3A01962R0031-20220101&qid=1658175487592>

<sup>2</sup> [https://ec.europa.eu/transparency/documents-register/detail?ref=C\(2013\)9049&lang=en](https://ec.europa.eu/transparency/documents-register/detail?ref=C(2013)9049&lang=en)

<sup>3</sup> [https://ec.europa.eu/transparency/documents-register/detail?ref=C\(2013\)9028&lang=en](https://ec.europa.eu/transparency/documents-register/detail?ref=C(2013)9028&lang=en)

### 3. COINNÍOLLACHA INCHÁILITHEACHTA

#### 3.1 Critéir incháilitheachta

Is ar bhonn na gcritéar foirmiúil seo a leanas amháin, nach mór iad a bheith comhlíonta **faoi sprioc-am le hiarratas a dhéanamh**, a chuirfear na hiarrthóirí san áireamh nuair a bheidh an rogha á dhéanamh:

- Náisiúntacht: ní mór do na hiarrthóirí a bheith ina saoránaigh de cheann amháin de Bhallstáit an Aontais Eorpaigh.
- Céim nó diplóma ollscoile: ní mór d'iarrthóirí:
  - leibhéal oideachais a bheith acu is comhionann le cúrsa iomlán ollscoile ar baineadh diplóma amach dá bharr i gcás ina maireann an ghnáth-thréimhse oideachais ollscoile 4 bliana nó níos mó;
  - nó leibhéal oideachais a bheith acu is comhionann le cúrsa iomlán ollscoile ar baineadh diplóma amach dá bharr agus taithí ghairmiúil iomchuí bliana amháin ar a laghad i gcás ina maireann an ghnáth-thréimhse oideachais ollscoile 3 bliana ar a laghad (ní féidir an bhliain amháin sin de thaithí ghairmiúil a chur san áireamh sa taithí ghairmiúil iarchéime a iarrtar thíos).
- Taithí ghairmiúil: ní mór d'iarrthóirí taithí ghairmiúil iarchéime 15 bliana ar a laghad<sup>4</sup> a bheith acu ar leibhéal ar féidir tosú air leis na cáilíochtaí dá dtagraítear thuas.
- Teangacha: ní mór d'iarrthóirí eolas cuimsitheach a bheith acu ar cheann amháin de theangacha oifigiúla an Aontais Eorpaigh<sup>5</sup> agus eolas sásúil ar cheann eile de na teangacha oifigiúla sin. Deimhneoidh na painéil roghnúcháin le linn na n-agallamh an gcomhlíonann iarrthóirí an ceanglas maidir le heolas sásúil ar cheann eile de theangacha oifigiúla an Aontais Eorpaigh. D'fhéadfaí an t-agallamh nó cuid den agallamh a dhéanamh sa teanga eile sin mar chuid den tástáil sin.
- Teorainn aoise: ní mór do na hiarrthóirí a bheith faoi bhun na gnáthaoise scoir, aois atá sainithe d'oifigigh an Aontais mar dheireadh na míosa inar shlánaigh an duine 66 bliana (féach Airteagal 52 (a) de na Rialacháin Foirne <sup>6</sup>).

#### 3.2 Critéir roghnúcháin

Ba cheart an méid seo a bheith ag an iarrthóir a n-éireoidh leis:

##### Saincileanna agus saintaithí

- Taithí ar ghníomhaíochtaí cumarsáide polaitiúla a bhaineann le feasacht na saoránach agus le faisnéis do shaoránaigh; b'fhearr dá mbeadh taithí i gceist a fuarthas i ngníomhaireachtaí cumarsáide, i gcomhlachtaí foilsitheoireachta, in údaráis náisiúnta, nó in eagraíochtaí idirnáisiúnta
- Inniúlacht mhaith chun oibre thar chríocha riaracháin

<sup>4</sup> Ní chuirtear taithí ghairmiúil san áireamh ach amháin más caidreamh oibre iarbhir atá i gceist léi, caidreamh atá sainmhínithe mar obair cheart a bhfuair an t-iarrthóir pá aisti mar fhostaí (ar aon chineál conartha) nó mar sholáthraí seirbhíse. Is ar bhonn pro rata a dhéanfar gníomhaíochtaí gairmiúla a rinneadh ar bhonn páirtaimseartha a ríomh, de réir an chéatadáin dheimhnithe de na huaireanta lánaimseartha a d'obair an t-iarrthóir. Tá saoire mháithreachais/saoire tuismitheora/saoire páiste a uchtú san áireamh más faoi chuimsiú conradh oibre a glacadh an tsaoire sin. Is cuid den taithí ghairmiúil i céim dhochtúra, fiú amháin nuair nach dochtúireacht ar pá í, ach uastréimhse 3 bliana amháin atá i gceist sa chás sin, agus ar choinníoll gur éirigh leis an iarrthóir an dochtúireacht a bhaint amach. Ní féidir tréimhse a chomhaireamh ach uair amháin.

<sup>5</sup> <https://eur-lex.europa.eu/legal-content/EN/TXT/?uri=CELEX%3A01958R0001-20130701>

<sup>6</sup> <https://eur-lex.europa.eu/legal-content/EN/TXT/?uri=CELEX%3A01962R0031-20140701>

- Sáreolas ar uirlisí cumarsáide, uirlisí digiteacha san áireamh, agus ar an gcumarsáid ar an leibhéal réigiúnach, ar an leibhéal náisiúnta agus ar an leibhéal idirnáisiúnta
- Eolas maith ar thosaíochtaí agus cleachtais cumarsáide polaitiúla; bheadh taithí ar fheachtais cumarsáide polaitiúla ina buntáiste
- Taithí ar bhainistíocht tionscadal

#### **Scileanna comhairleacha**

- Inniúlacht comhairle a thabhairt ar bhonn eolais fhairsing ar fheachtais chorparáideacha
- Cumas an fheidhmíocht a mheasúnú de réir cuspóirí, agus aiseolas iomchuí a thabhairt
- Inniúlacht tacaíocht agus comhairle ar ardchaighdeán a sholáthar

#### **Buanna pearsanta**

- Sárscileanna cumarsáide labhartha agus scríofa chun cumarsáid éifeachtach líofa a dhéanamh le páirtithe leasmhara inmheánacha agus seachtracha
- Cruthaitheacht agus cumas coincheapa agus smaointe nua a fhorbairt
- Scileanna chun fadhbanna a aithint agus a réiteach go héifeachtúil d'fhonn spriocanna a bhaint amach agus torthaí ar ardchaighdeán a sholáthar
- Cumas gníomhú as a stuaim féin
- An tsolúbthacht chun dul in oiriúint do chúinsí nua

## **4. ROGHNÚ AGUS CEAPADH**

Beidh trí chéim ar leith sa phróiseas, ceann i ndiaidh a chéile:

### **4.1. Réamhroghnú**

#### **4.1.1 Réamhroghnú ar bhonn cáilíochtaí**

Déanfaidh an coiste roghnúcháin, arna chomhdhéanamh i gcomhréir le hAirteagal 2(c) den Chinneadh ón gCoimisiún an 16 Nollaig 2013 maidir le beartais i leith gníomhairí sealadacha a fhostú agus a úsáid, déanfaidh sé réamhroghnú ar bhonn cáilíochtaí agus taithí oibre. Chuige sin, iarrtar ar iarrthóirí trí dhoiciméad a sholáthar:

- foirm iarratais agus í líonta isteach;
- CV; agus
- litir inspreagtha.

D'fhonn é a chur ar chumas an phainéil réamhroghnúcháin inghlacthacht na n-iarratas a mheas, iarrtar ar iarrthóirí na nithe seo a leanas a lua go soiléir sna doiciméid sin:

- Maidir le cúrsaí staidéir a rinneadh: dáta tosaigh agus dáta deiridh an chúrsa, gnáthfhad an chúrsa iomlán agus teideal beacht an dioplóma a baineadh amach;
- Maidir leis na tréimhsí taithí oibre: dáta tosaigh agus dáta deiridh gach tréimhse taithí oibre agus tuairisc bheacht ar na dualgais a rinneadh.

Má tá aon cheann de na trí dhoiciméad thuasluaite ar iarraidh nó mura bhfaightear iad faoin sprioc-am atá leagtha síos, measfar go bhfuil an t-iarratas ar neamhní go hiomlán.

Céim dhíbeartach atá i gcéim an réamhroghnúcháin agus mar sin is do na hiarrthóirí a réamhroghnófar, agus dóibh siúd amháin, a thabharfar cuireadh chun céim an roghnúcháin (féach Roinn 4.2).

Na doiciméid tacaíochta atá luaite i Roinn 4.1.2 thíos, Ní gá iad a chur ar fáil ag an gcéim seo. Iarrfar ag céim níos faide anonn den phróiseas roghnúcháin iad (féach Roinn 4.1.2).

#### **4.1.2 Doiciméid tacaíochta**

Roimh an agallamh (féach Roinn 4.2), ní mór do na hiarrthóirí a réamhroghnaíodh na doiciméid tacaíochta oifigiúla a sholáthar lena ndearbhaítear an fhaisnéis a thug siad san fhoirm iarratais, sa CV agus sa litir inspreagtha. I gcás nach soláthraítear na doiciméid sin faoin sprioc-am atá leagtha síos sa chuireadh chun agallaimh beidh an t-iarratas ar neamhní go hiomlán.

Ag seo na doiciméid tacaíochta oifigiúla a bheidh le cur isteach ag na hiarrthóirí sin dá dtabharfar cuireadh chun agallaimh, agus acu sin amháin:

- Cóip de dhoiciméad a chruthaíonn an tsaoránacht atá acu (cárta aitheantais nó pas);
- Cóip de na dioplómaí nó de na teastais a chruthaíonn go bhfuil an leibhéal oideachais acu a iarrtar;
- Teastais fostaíochta a chruthaíonn fad na taithí oibre atá acu.

Sna doiciméid sin ní mór dáta tosaigh, dáta deiridh agus leanúnachas gach ceann de na tréimhsí taithí oibre atá an t-iarrthóir ag iarraidh a chur san áireamh don phróiseas roghnúcháin seo, ní mór sin a bheith luaite go soiléir. Chuige sin, is é is fearr, na hiarrthóirí teastais fostaíochta óna n-iarfhostóirí agus óna bhfostóir reatha a chur ar fáil. Ina n-éagmais sin, glacfar le cóipeanna de chineálacha eile doiciméid, e.g.: conarthaí fostaíochta maille leis an gcéad duillín pá, an duillín pá deiridh, agus duillín pá na míosa deiridh de gach bliain eatarthu sin, i gcás conradh a mhair níos mó ná bliain; litreacha oifigiúla nó doiciméid cheapacháin, maille leis an duillín pá deiridh; taifid fostaíochta; dearbhuithe cánach.

Ní ghlacfar leis an iarratas go críochnaitheach go dtí go gcuirfear ar fáil na doiciméid tacaíochta a theastaíonn. I gcás nach bhfaightear na doiciméid sin faoin sprioc-am atá leagtha síos sa litir faoin réamhroghnú agus sa chuireadh chun agallaimh, beidh an t-iarratas ar neamhní go hiomlán.

Má tá aon amhras ar na hiarrthóirí faoi chineál nó faoi bhailíocht na ndoiciméad atá le cur ar fáil, ba cheart dóibh teagmháil a dhéanamh le rúnaí an choiste roghnúcháin deich lá oibre ar a laghad roimh an sprioc-am, tríd an mbosca ríomhphoist feidhmiúil ag an seoladh ríomhphoist seo:

[HR-2022-COMM-ADVISER@ec.europa.eu](mailto:HR-2022-COMM-ADVISER@ec.europa.eu)

Is é is cuspóir dó sin cabhrú leis na hiarrthóirí iarratas iomlán inghlactha a chur isteach faoin sprioc-am.

Tráth is faide anonn, iarrfar ar na hiarrthóirí a n-éireoidh leo bunchóipeanna na ndoiciméad uile a theastaíonn a chur ar fáil chun go ndearbhófar iad.

## 4.2. Roghnú

Iarrthóirí a n-éireoidh leo dul tríd an gcéim iontrála, tabharfar cuireadh chun agallaimh dóibh chun go measfar agus go gcuirfear i gcomparáid le chéile iad go hoibiachtúil neamhchlaonta ar bhonn a gcáilíochtaí, a dtaithí oibre agus a n-eolais ar theangacha, mar atá leagtha amach san fhógra seo.

Beidh an liosta d'iarrthóirí ar éirigh leo bailí go ceann dhá bhliain ar a mhéad. Féadfar síneadh a chur le bailíocht an phainéil.

## 5. IARRATAIS

Ní mór an fhoirm iarratais mar aon le CV agus litir inspreatha ina leagtar amach an chaoi a gcomhlíonann an t-iarrthóir na critéir a liostaítear faoi 3.2.2 'Taithí' a sheoladh chuig an seoladh seo a leanas:

[HR-2022-COMM-ADVISER@ec.europa.eu](mailto:HR-2022-COMM-ADVISER@ec.europa.eu)

Iarrtar ar iarrthóirí a n-iarratas a sheoladh in aon ríomhphost amháin, i bhformáid .zip nó .pdf. Forchoimeádann an Coimisiún an ceart aon teachtaireacht atá os cionn 2 MB a bhaint go huathoibríoch ón mbosca isteach.

Ní dhéanfar aon athrú ar na sonraí atá san fhoirm iarratais i ndiaidh an sprioc-ama le hiarratais a dhéanamh. Ní féidir an ceart chun ceartúcháin a fheidhmiú i ndiaidh an sprioc-ama le hiarratais a dhéanamh.

Ba cheart d'iarrthóirí gach comhfhreagras leis an gcoiste roghnúcháin, iarratais ar fhaisnéis san áireamh, a sheoladh chuig an mbosca ríomhphoist feidhmiúil céanna i gcónaí. Faoin iarrthóir atá sé rúnaí an choiste roghnúcháin a chur ar an eolas má athraíonn a sheoladh ríomhphoist le linn an phróisis roghnúcháin.

Is é an **28.11.2022 ar 12:00 (meán lae, am na Bruiséile)** an sprioc-am le hiarratais a dhéanamh.

## 6. EOLAS BREISE

Tá an fógra roghnúcháin seo foilsithe i 24 theanga oifigiúla an Aontais Eorpaigh ar shuímh ghréasáin Ard-Stiúrthóireacht na Cumarsáide (DG COMM) agus na hOifige Eorpaí um Roghnú Foirne (EPSO).

### Cumarsáid le hiarrthóirí

Is trí ríomhphost amháin a dhéanfar gach cumarsáid dhíreach idir na hiarrthóirí agus seirbhísí an Choimisiúin. Dá bhrí sin, ionas gur féidir le seirbhísí an Choimisiúin dul i dteagmháil le hiarrthóirí, ní mór do gach iarrthóir seoladh ríomhphoist bailí a thabhairt is féidir a úsáid le linn an phróisis roghnúcháin ar fad.

Cuirtear i gcuimhne d'iarrthóirí gur faoi rún atá an obair a dhéanann na painéil roghnúcháin. Tá cosc ar iarrthóirí dul i dteagmháil, bíodh sé díreach nó indíreach, le comhaltaí na bpainéal sin, agus tá cosc ar dhuine ar bith eile déanamh amhlaidh thar a gceann. Ní mór aon fhiosrúchán a sheoladh chuig rúnaíocht an phainéil ábhartha.

## **Comhdheiseanna**

I gcomhréir le hAirteagal 1d de na Rialacháin Foirne, cuireann an Coimisiún Eorpach beartas comhdheiseanna i bhfeidhm agus glacann sé iarratais gan aon idirdhealú a dhéanamh atá bunaithe ar aon fhoras amhail gnéas, cine, dath, tionscnamh eitneach nó sóisialta, airíonna géiniteacha, teanga, reiligiún nó creideamh, tuairimí polaitiúla nó eile, ballraíocht i mionlach náisiúnta, maoin, breith, míchumas, aois nó gnéaschlaonadh. Bheadh fáilte ar leith ag an gCoimisiún roimh iarratais ó mhná.

## **Sonraí pearsanta a chosaint**

Áiritheoidh an Coimisiún go bpróiseálfar sonraí pearsanta na n-iarrthóirí de réir mar a cheanglaítear le Rialachán (AE) 2018/1725 ó Pharlaimint na hEorpa agus ón gComhairle <sup>7</sup>. Baineann sé sin go háirithe le rúndacht agus le slándáil na sonraí sin.

---

<sup>7</sup> Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch. 39).